



Broj: 01/1-50-1-1-58/08  
Sarajevo, 15.12.2008. godine

## Z A P I S N I K

### 58. sjednice Ustavnopravne komisije

Sjednica je održana 15. 12. 2008. , s početkom u 14 sati.

Sjednici su prisustvovali članovi Komisije: Šefik Džaferović, Velimir Jukić, Lazar Prodanović, Ekrem Ajanović, Momčilo Novaković, Halid Genjac, Drago Kalabić i Adem Huskić.

Osim članova Komisije, sjednici su prisustvovali predstavnici: Agencije za sigurnost hrane BiH Sejad Mačkić, Zoran Đerić, Asim Leto, Džemil Hajrić, Ministarstva za ljudska prava i izbjeglice BiH Dragutin Čegar, Komisije za vanjsku trgovinu i carine Emira Češljarić i Radomir Marjanović, Parlamentarne skupštine BiH Dobrinka Savić i Igor Bunić, Ministarstva vanjske trgovine i ekonomskih odnosa BiH Milenko Pandurević i Nada Šupić, Ureda za veterinarstvo BiH Inga Dujmović, OHR-a Jelena Despot, OSCE-a Amra Zorlak, te Sektora za odnose s javnošću PSBiH Zoran Brkić.

Sjednici su prisustvovali sekretar Komisije Igor Bajić i stručni saradnik u Komisiji Nedžad Salman.

Komisija je jednoglasno usvojila sljedeći

## D N E V N I R E D

1. Usvajanje Zapisnika 57. sjednice Komisije, održane 1.12.2008.;
2. Prijedlog zakona o genetski modificiranim organizmima, predlagač: Vijeće ministara BiH, (postupak u nadležnoj komisiji u skladu s članom 110. Poslovnika Doma);
3. Prijedlog zakona o zaštiti i dobrobiti životinja, predlagač: Vijeće ministara BiH (postupak u nadležnoj komisiji u skladu s članom 110. Poslovnika Doma);
4. Prijedlog zakona o dopunama Zakona o izmirenju obaveza po osnovu računa stare devizne štednje, predlagač: poslanik Jerko Ivanković Lijanović (usklađenost sa Ustavom BiH i pravnim sistemom u skladu s članom 103. Poslovnika Doma);
5. Prijedlog zakona o izmjeni Zakona o državnoj službi u institucijama BiH, predlagači: poslanici Beriz Belkić, Niko Lozančić i Milorad Živković (usklađenost sa Ustavom BiH, pravnim sistemom i principu u skladu s čl. 103. i 104. Poslovnika Doma);
6. Ostala pitanja:
  - Zahtjev za autentičnim tumačenjem člana 7. tačka 2 a) Zakona o slobodnim zonama BiH ("Službeni glasnik BiH", br. 3/02 i 13/03), podnosilac zahtjeva: Federalno ministarstvo trgovine (razmatranje zahtjeva u skladu s članom 137.stav (4) i (6) Poslovnika Doma);
  - Akt Ministarstva za ljudska prava i izbjeglice BiH, broj: 08-05-4411-1/08, od 13.11.2008. (razmatranje zahtjeva u skladu s članom 41.stav (2) Poslovnika Doma).

### Ad.1. Usvajanje Zapisnika 57. sjednice Komisije, održane 1.12.2008.

S obzirom da nije bilo rasprave, Komisija je jednoglasno usvojila zapisnik 57. sjednice.

**Ad.2. Prijedlog zakona o genetski modificiranim organizmima, predlagač:****Vijeće ministara BiH****(postupak u nadležnoj komisiji u skladu s članom 110. Poslovnika Doma)**

Predsjedavajući je otvorio raspravu u kojoj su učestvovali svi članovi Komisije i predstavnici Agencije za sigurnost hrane BiH. Na Prijedlog zakona amandmane su podnijeli: Šefik Džaferović, Lazar Prodanović, Slavko Jovičić i Velimir Jukić. Komisija je konstatirala da amandmani poslanika Lazara Prodanovića nisu blagovremeno podneseni.

Nakon rasprave, glasalo se o amandmanima:

Komisija je jednoglasno prihvatila amandmane I. i II. poslanika Šefika Džaferovića koji glase:

**Amandman I.**

U članu 55. stav (2) brišu se riječi: „po šest iz oba entiteta i dva iz Brčko Distrikta BiH“.  
Ostali dio teksta ostaje nepromijenjen.

**Amandman II.**

U članu 5. stav e) mijenja se i glasi:

„e) Samokloniranje koje se sastoji od uklanjanja sekvenci nukleinske kiseline iz ćelije organizma koje može ali i ne mora biti praćeno ponovnim umetanjem cijele ili sekvence te nukleinske kiseline (ili sintetičkog ekvivalenta), sa ili bez prethodne enzimske ili mehaničke faze, u ćelije iste vrste ili u ćelije filogenetički blisko srodnih vrsta, koje mogu izmjenjivati genetički materijal prirodnim fiziološkim procesima, gdje ne postoji vjerovatnoća da će dobiveni mikroorganizam izazvati bolest kod ljudi, životinja ili biljaka.

Samokloniranje može uključivati upotrebu rekombinantnih vektora s već poznatom praksom sigurne upotrebe u određenom mikroorganizmu.“

Komisija je jednoglasno prihvatila amandman I. poslanika Slavka Jovičića koji glasi:

**Amandman I.**

U članu 1. u stavu (2) riječi: „ genetski modificiranu hranu i hranu za životinje“ zamjenjuju se riječima: „genetski modificirane organizme i proizvode od genetski modificiranih organizama kao i žive modificirane organizme“.

Komisija, sa dva glasa „za“, četiri glasa „protiv“ i bez „suzdržanih“ glasova, nije prihvatila amandman II. poslanika Slavka Jovičića koji glasi:

**Amandman II.**

Član 3. mijenja se i glasi:

„Član 3.  
(Nadležni organi)

(1) U smislu ovog zakona, nadležni organi su: entitetska ministarstva nadležna za oblast poljoprivrede i Odjeljenje za poljoprivredu, šumarstvo i vodoprivredu Brčko Distrikta BiH kao glavni nadležni organi, Agencija za sigurnost hrane BiH (u daljnjem tekstu: Agencija), Ured za veterinarstvo BiH, Uprava BiH za zaštitu zdravlja bilja i nadležni organi entiteta i Brčko Distrikta BiH nadležni za oblasti zdravstva i zaštite okoliša.

(2) Za provođenje ovog zakona, u slučaju kada se GMO i/ili proizvodi koji sadrže i/ili se sastoje i/ili potiču od GMO-a:

a) ograničeno upotrebljavaju u kontroliranom zatvorenom sistemu potrebna je saglasnost entitetskih ministarstva nadležnih za pitanja nauke;

b) stavljaju na tržište:

1) kao hrana ili hrana za životinje potrebna je saglasnost Agencije;

2) kao reprodukcioni materijal u poljoprivredi i šumarstvu ili kao sredstva za zaštitu bilja potrebna je saglasnost Uprave BiH za zaštitu zdravlja bilja;

3) kao lijekovi u veterinarstvu ili reprodukcioni materijal u veterinarstvu, potrebna je saglasnost Ureda za veterinarstvo BiH;

4) prilikom upotrebe GMO-a i/ili proizvoda koji sadrže i/ili se sastoje i/ili potiču od GMO-a u kozmetici, farmaciji ili zdravstvenoj zaštiti ljudi potrebna je saglasnost entitetskih ministarstva zdravstva i Brčko Distrikta BiH;

v) za inspeksijski nadzor označavanja u prometu GMO-a i/ili proizvoda koji sadrže i/ili se sastoje i/ili potiču od GMO-a, nadležne su entitetske uprave za inspeksijske poslove, kantonalne inspekcije, inspekcije u okviru lokalnih organa uprave i Inspektorat Vlade Brčko Distrikta BiH.

(3) Nadležni organi iz st. (1) i (2) ovog člana provodit će službene kontrole, inspeksijski i upravni nadzor u skladu s važećim zakonskim propisima u Bosni i Hercegovini, entitetima i Brčko Distriktu BiH. Nadležni organi dužni su međusobno saradivati.

Naučno-stručna tijela osnovana u skladu s ovim zakonom dužna su nadležnim organima uprave iz st. (1) i (2) ovog člana pružiti stručnu pomoć u provođenju ovog zakona.

Komisija je, sa četiri glasa „za“, dva „protiv“ i bez „suzdržanih“ glasova, prihvatila amandman III. poslanika Slavka Jovičića koji glasi:

#### **Amandman III.**

Član 5. briše se.

Komisija je, sa pet glasova „za“, jednim „protiv“ i jednim „suzdržanim“ glasom, prihvatila amandman IV. poslanika Slavka Jovičića koji glasi:

#### **Amandman IV.**

Iza člana 4. dodaje se novi član 5. koji glasi:

„Član 5.

(Zabrana namjernog unošenja)

Zabranjuje se namjerno unošenje genetski modificiranih organizama kao i živih modificiranih organizama u okoliš na teritoriji Bosne i Hercegovine.“

Komisija je, sa šest glasova „za“, bez glasova „protiv“ i jednim „suzdržanim“ glasom, prihvatila amandman V. poslanika Slavka Jovičića koji glasi:

#### **Amandman V.**

Poglavlje V. Namjerno unošenje GMO-a u okoliš i čl. od 34. do 41. brišu se.

Komisija je, sa pet glasova „za“, jednim glasom „protiv“ i jednim „suzdržanim“ glasom, prihvatila amandman VI. poslanika Slavka Jovičića koji glasi:

#### **Amandman VI.**

Član 44. stav (1) mijenja se i glasi:

- (1) Nadležni organ ispituje i utvrđuje usklađenost zahtjeva s odredbama ovog zakona i drugih propisa, te nakon pribavljenog pozitivnog mišljenja Vijeća za stavljanje na tržište GMO-a ili proizvoda od GMO-a i provedene javne rasprave izrađuje izvještaj o procjeni prikladnosti stavljanja na tržište GMO-a ili proizvoda od GMO-a.

Komisija je, s pet glasova „za“, bez glasova „protiv“ i dva „suzdržana“ glasa, prihvatila amandman VII. poslanika Slavka Jovičića koji glasi:

#### **Amandman VII.**

Član 46. briše se.

Komisija je, s pet glasova „za“, jednim „protiv“ i jednim „suzdržanim“ glasom, prihvatila amandman VIII. poslanika Slavka Jovičića koji glasi:

#### **Amandman VIII.**

U članu 47. stav (1) tačka b) mijenja se i glasi:

- b) pribavljanja pozitivnog mišljenja Vijeća za GMO;

Komisija, s tri glasa „za“, pet glasova „protiv“ i bez „suzdržanih“ glasova, nije prihvatila amandman IX. poslanika Slavka Jovičića koji glasi:

#### **Amandman IX.**

Član 55. mijenja se i glasi:

#### **„Član 55. (Vijeće za GMO)**

(1) Radi praćenja stanja i razvoja u oblasti rukovanja GMO-om i pružanja stručne pomoći nadležnim organima u provođenju ovog zakona, Vijeće ministara, na prijedlog naučnih, stručnih i obrazovnih institucija iz entiteta i Brčko Distrikta BiH, odlukom osniva Vijeće za GMO (u daljnjem tekstu: Vijeće) na period od četiri godine, s mogućnošću obnavljanja mandata za period od naredne četiri godine.

(2) Vijeće ima 14 članova, po šest iz oba entiteta i dva iz Brčko Distrikta BiH, koji se biraju isključivo između eminentnih naučnih radnika doktora nauka iz oblasti genetike, mikrobiologije, medicine, veterinarske medicine, biohemije, molekularne biologije, farmacije, biotehnologije, poljoprivrede, šumarstva, prava, zaštite na radu, zaštite prirode i zaštite životne sredine, vodeći računa o ravnopravnoj zastupljenosti svih naroda.

(3) Vijeće među svojim članovima bira predsjednika i njegovog zamjenika. Vijeće je samostalno i nezavisno tijelo i njegov rad je javan.

(4) Vijeće donosi poslovnik kojim uređuje način rada.

(5) Sredstva za rad Vijeća i obavljanje stručno-administrativnih poslova osiguravaju se u budžetu institucija Bosne i Hercegovine.

(6) Članovi Vijeća za GMO ne mogu biti zaposleni u nadležnim organima.“

Komisija je, uskladu s članom 109. stav (3) Poslovnika Doma, sa pet glasova „za“, dva glasa „protiv“ i jednim „suzdržanim“ glasom, prihvatila amandman I. poslanika Halida Genjca koji glasi:

#### **Amandman I.**

U članu 55. naziv člana mijenja se i glasi: „Vijeće za GMO“, a stav (4) briše se.

Komisija je jednoglasno prihvatila amandman X. poslanika Slavka Jovičića koji glasi:

#### **Amandman X.**

U članu 56. tačka b) mijenja se i glasi:

b) prati naučno-stručna dostignuća i daje mišljenja u vezi s upotrebom genetičke tehnologije i upotrebom GMO-a;

Komisija je, sa šest glasova „za“, bez glasova „protiv“ i dva „suzdržana“ glasa, prihvatila amandman I. poslanika Velimira Jukića koji glasi:

#### **Amandman I.**

U članu 3. stav (2) tačka b) briše se.

Poslanik Velimir Jukić odstao je od amandmana II. i III. koji glase:

#### **Amandman II.**

U članu 33. na kraju rečenice briše se „tačka“, dodaje se tekst: „uz obavezno pribavljanje prethodne saglasnosti nadležnih kantonalnih organa uprave“.

#### **Amandman III.**

U članu 53. stav (3) mijenja se i glasi: „Reprodukcionu biljni materijal koji sadrži genetski modificirane organizme u bilo kojoj količini mora se označiti u skladu posebnim propisima“.

Nakon rasprave, Komisija je, s pet glasova „za“, dva glasa „protiv“ i jednim „suzdržanim“ glasom, odlučila:

- Ustavnopravna komisija prihvata tekst Prijedloga zakona o genetski modificiranim organizmima sa usvojenim amandmanima i predlaže Predstavničkom domu njegovo usvajanje;

- Ustavnopravna komisija predlaže Predstavničkom domu da ovlasti Komisiju da, prije objavljivanja Zakona, uz stručnu pomoć Agencije za sigurnost hrane BiH izvrši tehničko usklađivanje teksta Zakona o genetski modificiranim organizmima u pogledu pozivanja na odredbe koje se mijenjaju ovim zakonom;
- Za izvjestioca, u plenarnoj fazi, u skladu s članom 113. Poslovnika Predstavničkog doma Parlamentarne skupštine BiH, imenuje se predsjedavajući Komisije Šefik Džaferović.

### **Ad.3. Prijedlog zakona o zaštiti i dobrobiti životinja, predlagač: Vijeće ministara BiH (postupak u nadležnoj komisiji u skladu s članom 110. Poslovnika Doma)**

Predsjedavajući je otvorio raspravu u kojoj su učestvovali svi članovi Komisije i predstavnici Ureda za veterinarstvo BiH. Na Prijedlog zakona amandmane su podnijeli: Sefer Halilović Lazar Prodanović i Selim Bešliagić.

Nakon rasprave glasalo se o amandmanima:

Komisija jednoglasno nije prihvatila amandman I. poslanika Sefera Halilovića koji glasi:

#### **Amandman I.**

U članu 4. u tački i) na kraju teksta dodaju se riječi: „ izuzev korida.“

Komisija je jednoglasno prihvatila amandmane I. i II. poslanika Lazara Prodanovića koji glase:

#### **Amandman I.**

U članu 2. u tački d) „higijenski servis“ iza riječi „izgubljenih“, dodaju se riječi: „i uginulih“.

#### **Amandman II.**

U članu 8. „Prodaja kućnih ljubimaca“ iza stava (1) dodaju se tri nova stava, koja glase:

„2) Zabranjena je prodaja kućnih ljubimaca na pijacama i sajmovima.

3) Prodaja kućnih ljubimaca dozvoljena je samo u trgovinama koje ispunjavaju uslove:

- a) za svaku životinju se mora osigurati dokaz o njenom porijeklu i zdravstvenom stanju.
- b) radnici u trgovinama moraju biti osposobljeni za brigu o životinjama.

4) Zabranjeno je prodavati egzotične životinje i životinje koje su zakonom zaštićene.“

Komisija je jednoglasno prihvatila amandmane I., II., III., IV. i V. poslanika Selima Bešliagića koji glase:

#### **Amandman I.**

U članu 3. iza riječi „štetu“ dodaju se riječi: „zabranjeno je životinju mučiti i namjerno izlagati stresu i strahu“.

#### **Amandman II.**

U članu 4. u tački e) nakon riječi „izlaganja“ dodaju se riječi: „ cirkuskih predstava“.

U članu 4. u tački f) nakon riječi „životinja“ dodaju se riječi: „uključujući borbe pasa, bikova, medvjeda, pijetlova kao i svih ostalih životinja“.

U članu 4. u tački i) nakon riječi „životinje“ ostatak teksta briše se“.

U članu 4., u tački j) nakon riječi „lovu“ dodaju se riječi: „i ribolovu“.

U članu 4., nakon tačke v), dodaju se nove tačke ( z) , ž), aa), bb), cc), dd), ee), ff),gg), hh), i ii) koje glase:

- „ z) upotrebljavati nedozvoljne zamke za hvatanje životinja;
- ž) uzgajati životinje u svrhu proizvodnje krzna;
- aa) držanje životinja u cirkusima te njihovo korištenje u cirkuskim drugim predstavama sa životinjama;
- bb) organizirati trke pasa na tvrdim podlogama;
- cc) koristiti tehničke uređaje, pomoćna sredstva ili naprave kojima se u obliku kazne utiče na ponašanje životinja, uključujući bodljikave ogrlice ili sredstva koja uključuju upotrebu električne struje ili hemijskih tvari;
- dd) uzgajati životinje na način da trpe bol, patnju i strah te ih namjerno ozljeđivati, protivno pravilima struke, odnosno najnovijim naučnim dostignućima, te uvoziti i prodavati životinje koje potiču iz takvog uzgoja;
- ee) povećavati agresivnost životinja selekcijom ili drugim metodama;
- ff) davati žive životinje kao nagrade u igrama na sreću;
- gg) prisiljavati životinje na ponašanje koje kod njih izaziva bol, patnju, ozljede ili strah;
- hh) izlagati životinje nepovoljnim temperaturama i vremenskim uslovima, protivno prihvaćenim zoohigijenskim standardima za pojedinu vrstu ili nedostatku kiseonika, čime se kod životinja uzaziva bol, patnja, ozljede ili strah;
- ii) zanemarivati životinje s obzirom na njihovo zdravlje, smještaj, ishranu i njegu “.

#### **Amandman III.**

U članu 5. dodaju se nove tačke koje glase:

- „f) ne izlagati životinju ekstremnoj toploti ili hladnoći
- g) „osigurati životinji dovoljno kretanja“.

#### **Amandman IV.**

U članu 6. stav (3) mijenja se i glasi: „ Zabranjeno je držati kao kućne ljubimce životinje koje su zaštićene, divlje životinje, te životinjske vrste i pasmine koje su opasne za život.“

Dodaje se novi stav (4) koji glasi:

(4) Imaoci kućnih ljubimaca moraju osigurati kontrolu razmnožavanja životinja pod njihovim nadzorom.“

#### **Amandman V.**

Nakon člana 6. dodaje se novi član 6 a. koji glasi:

"Uzgoj kućnih životinja namijenjenih prodaji ne može početi bez rješenja o zadovoljavanju uslova koje donosi nadležno ministarstvo, na prijedlog Ureda.“

Komisija je, sa sedam glasova „za“, bez glasova „protiv“ i jednim „suzdržanim“ glasom, prihvatila amandman VI. poslanika Selima Bešlagića koji glasi:

#### **Amandman VI.**

U sadašnjem članu 7. dodati stav (3) koji glasi: „Ured će voditi registar svih označenih pasa i mačaka.“

Komisija je jednoglasno prihvatila amandmane VII. i VIII. poslanika Selima Bešlagića koji glase:

#### **Amandman VII.<sup>1</sup>**

U članu 8. broj „ 16“ zamijenjuje se brojem „18“.

Nakon stava (1) dodaju se novi stavovi koji glase:

---

<sup>11</sup> Amandman je normativno –tehnički uobličen zbog konzistentnosti pravne norme.

„(2) Prodaja životinja u trgovinama za prodaju kućnih ljubimaca dozvoljena je samo ako su ispunjeni posebni uslovi, i za to izdato rješenje nadležnog organa:

- a) da je za svaku životinju osiguran dokaz o njenom porijeklu i zdravstvenom stanju;
- b) da su radnici u trgovinama osposobljeni za brigu o životinjama i moraju izdavati pisana uputstva o odgovarajućem načinu držanja životinja koje prodaju;

(4) Zabranjeno je prodavati pse i mačke u trgovinama za prodaju kućnih ljubimaca i egzotične životinje koje su zakonom zabranjene;

(6) Posebne uslove iz stava (2) ovog člana, te uslove za osposobljenost osoblja i način propisivanja uputstava iz stava (3) ovog člana propisuje nadležni organ.“

#### **Amandman VIII.**

U članu 10. tačke k), i) brišu se.

Poslanik Selim Bešlagić odustao je od amandmana IX., X. i XI. koji glase:

#### **Amandman IX.**

U članu 13. tačke d), e) brišu se.

#### **Amandman X.**

U članu 14. riječ „brzu“ zamjenjuje se riječju „trenutnu“.

#### **Amandman XI.**

U članu 15. stav (2) tačka a) briše se.

Komisija je, sa sedam glasova „za“, jednim glasom „protiv“ i bez „suzdržanih“ glasova, prihvatila amandman XII. poslanika Selima Bešlagića koji glasi:

#### **Amandman XII.**

Iza člana 15. dodaje se novi član 15 a. koji glasi:

##### **Član 15a.**

„(1) U klaonici se sa životinjama mora postupati na sljedeći način:

- a) životinje za klanje treba po prispieću istovariti iz prijevoznog sredstva uz upotrebu odgovarajuće opreme, da se životinje poštede uznemirenosti, straha, patnji i bolova.
- b) kretanje životinje unutar kruga klaonice do prostora za smještaj treba se odvijati pažljivo i bez nanošenja boli, uz primjenu odgovarajućeg pribora za vođenje.
- c) klaonice moraju biti opremljene odgovarajućim oborima ili stajama u koje životinje treba da budu smještene, zaštićene od nepovoljnih klimatskih uslova, hranjene i napajane do klanja.
- d) životinje moraju biti omamljene odgovarajućim postupcima neposredno prije klanja, kojim se moraju dovesti u stanje neosjetljivosti i u tom stanju usmrtniti.

(2) Klanje se mora obaviti upotrebom odgovarajuće opreme.

(3) Bolesne i povrijeđene životinje treba klati na samom kraju klanja, poslije zdravih životinja, bez dodatnog izazivanja boli i mučenja.

(4) Detaljne uslove za zaštitu životinja prilikom klanja propisuje nadležno ministarstvo, na prijedlog Ureda.

(5) Životinja se ne smije zaklati ako nije izvršen veterinarski pregled prije klanja i ako nije omamljena na propisan i stručan način.“

Komisija je jednoglasno prihvatila amandmane XIII. i XIV. poslanika Selima Bešlagića koji glase:

#### **Amandman XIII.**

Iza člana 16. dodaje se novi član 16a. koji glasi:



„16.a.

(1) Zabranjeno je prevoziti životinje ako bi se prijevozom izazvale patnje, bol, mučenja, oboljenja, uginuća životinja kao:

a) utovar i prijevoz tokom velike vrućine ili hladnoće.

b) prijevoz u nepokrivenim kamionima, vagonima, dijelu plovila pri čemu životinje nisu zaštićene od klimatskih uslova.

c) prijevoz u zatvorenim prijevoznim sredstvima, kavezima, ambalažama, ako u njima nije osigurano provjetravanje.

d) prijevoz životinja osjetljivih na niske ili visoke temperature ako u prijevozu nije osigurana odgovarajuća temperatura.

f) prijevoz bez osiguranja od samopovređivanja životinje, povređivanja drugih životinja ili ispadanja iz prijevoznog sredstva.

g) prijevoz bez osiguranog hranjenja, napajanja i odmora životinja u intervalima koji su propisani.

h) prijevoz bolesnih životinja ili u slučaju kad postoji sumnja da su bolesne, ako nije osigurana veterinarska pomoć.

i) prijevoz životinja za koje postoji sumnja da boluju od zaraznih bolesti.

j) prijevoz vodenih životinja u posebnim prijevoznim sredstvima ili spremnicima bez dovoljne količine vode, odgovarajuće temperature i kiseonika.

k) prijevoz ženki u posljednjoj četvrtini bremenitosti, ženki u prvih 48 sati nakon okota i njihove mladunčadi osim ako je potrebna hitna veterinarska intervencija.

i) zabranjeno je prevoziti materijale u istom prijevoznom sredstvu koji bi mogli biti opasni po njihovo zdravlje i život.

(2) Obavljanje prijevoza na neki od načina iz tačke i) ovog člana smatra se mučenjem životinja.

(3) Prijevoznik je dužan osigurati zaštitu od opasnih i divljih životinja, te njihovu fizičku zaštitu, a prijevozno sredstvo mora biti tako označeno da upozorava da se prevoze opasne ili divlje životinje.

(4) Prijevoznik je dužan odrediti lice koje će se tokom prijevoza brinuti o ispunjavanju propisanih uslova za transport životinja, njihovom napajanju, hranjenju i odmoru, a koje mora biti stručno osposobljeno, čiji program obuke, osposobljavanja i obučenosti propisuje nadležno ministarstvo.

(5) Pri utovaru, istovaru, pretovaru i tjeranju zabranjena je upotreba predmeta kojima se direktno nanosi bol životinji.“

#### **Amandman XIV.**

U članu 25. u tački c), nakon riječi „ životinju“ dodaju se riječi: „i omogućiti joj dovoljno kretanja“.

Nakon tačke e) dodaju se nove tačke koje glase:

„f) koja glasi: „izvršiti obaveznu sterilizaciju i kastraciju svih pristiglih, napuštenih i izgubljenih životinja nakon isteka roka iz stava (2) ovog člana.

g) primati prijave o napuštenim i izgubljenim životinjama.

h) angažirati se na udomljavanju životinja i prolanaženju vlasnika.

i) „ mikročipovati svaku pristiglu životinju ako ona već nije mikročipovana.“

Nakon stava (3) dodaje se novi stav (4) koji glasi:

„Sklonište za životinje osniva fizičko ili pravno lice, jedinica lokalne samouprave, općina, grad, kanton ili entitet.“

Dosadašnji stav (4) postaje stav (5) u kojem se nakon riječi „životinje“ dodaju riječi: „te vodi upisnik skloništa za životinje.“

Poslanik Selim Bešliagić odustao je od amandmana XV. koji glase:

#### **Amandman XV.**

U članu 26. stav (2) posljednja rečenica briše se.

Komisija je jednoglasno prihvatila amandmane XVI. i XVII. poslanika Selima Bešliagića koji glase:

#### **Amandman XVI.**

U članu 28. nakon stava (6) dodaje se novi stav (7) koji glasi:

„(7) Imaoci životinja za eksperiment dužni su da:

- a) životinjama za eksperimente pruže smještaj, hranu, vodu, brigu adekvatnu njihovom zdravlju i dobrobiti.
- b) svedu na minimum ograničenja s ciljem zadovoljenja njihove psihičke i etiološke potrebe.
- c) nadgledaju okruženje u kojem se nalaze.
- d) svakodnevno provjeravaju njihovu dobrobit i zdravstveno stanje.
- e) otklone uzroke nezgoda, trpljenja, bol na najbrži mogući način.
- f) obilježe životinje i vode evidenciju.”

#### **Amandman XVII.**

U članu 40. dodaju se novi stavovi koji glase:

(2) Imaoci pasa i mačaka dužni su da mikročipuju i upišu u registar svoje kućne životinje rođene, odnosno nad kojima je stečeno vlasništvo prije stupanja na snagu ovog zakona, u roku od šest mjeseci od dana stupanja na snagu ovog zakona.

(3) Skloništa za životinje iz člana 25. moraju se osnovati u roku od godine dana od stupanja ovog zakona na snagu.

(4) Do osnivanja skloništa za životinje iz člana 25. ovog zakona, od tijela predviđenih ovim zakonom, veterinarske stanice mogu, u saradnji s nadležnim općinskim organima, provoditi kastraciju, sterilizaciju i obilježavanje napuštenih životinja, naročito pasa lotalica, te njihovo ponovno puštanje na mjesta prirodnog staništa, a s ciljem stabilizacije populacije napuštenih životinja kontrolom njihove reprodukcije u kratkom roku.

(5) Odredba iz člana 4. o zabrani uzgoja životinja u svrhu proizvodnje krzna stupit će na snagu 2018.godine.

Nakon rasprave, Komisija je jednoglasno odlučila:

- Ustavnopravna komisija prihvata tekst Prijedloga zakona o zaštiti i dobrobiti životinja sa usvojenim amandmanima i predlaže Predstavničkom domu njegovo usvajanje;
- Za izvjestioca, u plenarnoj fazi, u skladu s članom 113. Poslovnika Predstavničkog doma Parlamentarne skupštine BiH, imenuje se predsjedavajući Komisije Šefik Džaferović.

**Ad.4. Prijedlog zakona o dopunama Zakona o izmirenju obaveza po osnovu računa stare devizne štednje, predlagač: poslanik Jerko Ivanković Lijanović (usklađenost sa Ustavom BiH i pravnim sistemom u skladu s članom 103. Poslovnika Doma)**

Nakon rasprave, Komisija je jednoglasno utvrdila da:

- postoji valjan ustavnopravni osnov za donošenje Zakona;
- je Prijedlog zakona usklađen sa Ustavom BiH i pravnim sistemom.

**Ad.5. Prijedlog zakona o izmjeni Zakona o državnoj službi u institucijama BiH, predlagači: poslanici Beriz Belkić, Niko Lozančić i Milorad Živković (usklađenost sa Ustavom BiH, pravnim sistemom i principi u skladu s članom 103. i 104. Poslovnika Doma)**

Nakon rasprave, Komisija je jednoglasno utvrdila da:

- postoji valjan ustavnopravni osnov za donošenje Zakona;
- je Prijedlog zakona usklađen sa Ustavom BiH i pravnim sistemom.

Komisija, s tri glasa „za“, četiri glasa „protiv“ i jednim „suzdržanim“ glasom, nije prihvatila principe Zakona.

**Ad.6. Ostala pitanja:**

- **Zahtjev za autentičnim tumačenjem člana 7. tačka 2 a) Zakona o slobodnim zonama BiH ("Službeni glasnik BiH", br. 3/02 i 13/03), podnosilac zahtjeva: Federalno ministarstvo trgovine (razmatranje zahtjeva u skladu s članom 137. stav (4) i (6) Poslovnika Doma);**
- **Akt Ministarstva za ljudska prava i izbjeglice BiH, broj: 08-05-4411-1/08, od 13.11.2008. (razmatranje zahtjeva u skladu s članom 41. stav (2) Poslovnika Doma).**

Predsjedavajući je predložio, a Komisija jednoglasno prihvatila prijedlog predsjedavajućeg Komisije da se ove dvije tačke dnevnog reda razmatraju na sljedećoj sjednici Ustavnopravne komisije.

S obzirom da nije bilo više pitanja, sjednica je završena u 16,30 sati.

**SEKRETAR KOMISIJE**  
**Igor Bajić**

**PREDSJEDAVAJUĆI KOMISIJE**  
**Šefik Džaferović**